

Visoki predstavnik pozdravlja euro-atlansku viziju Bosne i Hercegovine

Visoki predstavnik je danas pozdravio rezultate jučerašnjih sjednica Narodne skupštine Republike Srpske i Doma naroda Bosne i Hercegovine.

«Zakonodavna tijela Bosne i Hercegovine su jučer napravila nekoliko značajnih koraka ka ostvarenju ambicija prema euro-atlanskim integracijama» rekao je visoki predstavnik. «Nije bilo jednostavno postići jučerašnji napredak u oblasti reforme policije i napraviti odlučujući korak u oblasti reforme odbrane i javnog RTV emitiranja, ali gordijski čvor se počeo otpetljivati i jučerašnje odluke će ubrzati kretanje Bosne i Hercegovine prema njenom konačnom cilju – članstvu u EU i NATO-u.»

Narodna skupština Republike Srpske je jučer po prvi put odlučno glasala za pridržavanje tri principa Evropske komisije u oblasti reforme policije. Ukoliko sada ostale Parlamentarne skupštine u BiH ispune tri principa koje je za reformu policije utvrdila Evropska komisija, biti će napravljen odlučujući korak koji će omogućiti da Evropska komisija preporuči da pregovori o potpisivanju Sporazuma o stabilizaciji i pridruživanju sa BiH otpočnu u toku ove godine. Poruka je jasna: u periodu od pet godina Bosna i Hercegovina će imati jedinstvenu i integrisanu policiju na državnom nivou i lokalne policijske oblasti koje će prelaziti preko međuentitetske linije razgraničenja u ograničenom broju područja, tamo gdje je to tehnički potrebno.

U isto vrijeme Dom naroda BiH je jučer usvojio Zakon o odbrani BiH i Zakon o službi u oružanim snagama BiH. Ovom reformom se otvara put ka Programu «Partnerstvo za mir» NATO saveza te, na kraju ovog procesa, ka punom članstvu u NATO savezu.

Značajan napredak je jučer ostvaren i u oblasti reforme PBS-a, nakon usvajanja Zakona o sistemu javnog RTV emitiranja u Domu naroda BiH, što je također bio jedan od dosada neispunjenih uvjeta za pokretanje pregovora o stabilizaciji i pridruživanju.

«Članstvo u «Partnerstvu za mir» i, konačno, u NATO savezu, najjačem i najuspješnijem sigurnosnom savezu na svijetu, u velikoj mjeri će poboljšati sigurnosnu situaciju u BiH. To je dokaz spremnosti organa vlasti BiH da prevaziđu svoju ratnu i poratnu prošlost», rekao je visoki predstavnik.

«Ove reforme još uvijek nisu završene i Bosna i Hercegovina mora usmjeriti svoje napore na ostvarivanje potpune saradnje sa Haškim tribunalom, ali su njene institucije pokazale da mogu riješavati i najteža pitanja iz prošlosti, u korist stabilnije i sigurnije Bosne i Hercegovine na putu ka EU i NATO-u. Ovaj sveprisutniji politički legitimitet ohrabruje ulaganja, što može osigurati otvaranje novih radnih mjesta koja su očajnički potrebna običnim građanima ove zemlje», rekao je visoki predstavnik u svojoj današnjoj izjavi.